

ut nihil terreni contineat, sed a sola efficacia tua
Divinitatis contineatur.

Domine, fateor, quod secundum merita mea non
sum dignus accipere portiunculam donorum tuorum. Sed tamen, meritis Sacratissimæ Passionistæ,
ac Sanctæ Genitricis tuæ et omnium Sanctorum atque Electorum tuorum, supplico pietati tui, ut transfigas cor meum tui amoris sagitta. Amen.

Anima Christi, etc. pag. 43.

Oratio ad B. M. V.

O Maria, Mater purissima et castissima, pro me, humili clienti tuo, intercedere materna benignitate digneris; ut, castis hisce Mysteriis refectus, omnia, quæ fœdum impuritatis vitium sapiunt, summo semper cum horro fugiam et castis usque moribus Domino Deo merear famulari. Amen.

Oratio ad Sanctos.

Obsecro te, Domine Iesu Christe, per intercessionem S. Angeli Custodis, S. Joseph, SS. Patronorum meorum N. N. et Sancti N., ut Divina Mysteria, quorum tua gratia nunc particeps factus sum, tribuant mihi et omnibus, pro quibus illa obtuli, fidei, spei et charitatis augmentum, et animas nostras custodiant in vitam æternam. Amen.

DIES V.

ANTE MISSAM.

O potestas ineffabilis, que in nobis habitare dignata est per impositionem sanctorum Sacerdotum. O quam magnam in se continet dignitatem formidabile et admirabile Sacerdotium! (S. Ephr. de Sac.)

O miraculum! O benignitatem! qui cum Patre sursum sedet, in illo ipso temporis articulo sacerdotum manibus pertractatur! (S. Chrys. Dial., L. III.)

Actus adorationis et Gratiarum Actionis.

O dulcissime Salvator, Christe Iesu, qui eximia charitate nos misere perditos redemisti pretio Sanguinis tui; et in hujus amoris tui memoriam, nec non in pignus futurae gloriæ, tam admirabili potentia, sapientia et bonitate dedisti nobis, in cibum et potum, ipsum Corpus et Sanguinem tuum: denique ad hæc divina Mysteria me vilissimum peccatorem in numerum tuorum Sacerdotum ineffabili clementia vocare dignatus es. Adoro te ex toto corde, et gratias tibi ago ex intimis visceribus animæ meæ pro tam immensis beneficiis tuis, et affectus omnium electorum mihi medullitus opto, ut placere tibi possim in hoc opere quod facturus sum.

Actus contritionis.

Sed heu me miserum! qui hactenus tam indigne in vocacione mea vixi, et toties et tam graviter te Deum meum offendii peccatis meis; sed nunc de iis doleo ex intimo corde meo ob amorem tui super omnia; et deinceps tibi soli servire, placere et adhaerere propono.

Actus puræ intentionis.

Proinde nunc accedens ad mensam sacri Convivii tui, ex omni affectu cordis mei tibi hoc Sacrificium Missæ, dignissimam hostiam Corporis et Sanguinis tui, quam ipse semel pro nobis in ara Crucis obtulisti, offerre intendo ad laudem et gloriam æternæ Majestatis tue, in memoriam Sanctæ Incarnationis, Vitæ, Passionis ac Mortis tue : in gratiarum actionem pro omnibus donis, et beneficiis toti cœtui Electorum, et mihi indignissimo peccatori hucusque præstitis vel umquam præstandis : pro salute quoque fidelium vivorum NN. et solatio defunctorum NN. Et utinam ex omni affectu, fervore et desiderio amicorum tuorum, seu jam regnantium in celis, vel adhuc militantium in terris, hoc tam grande tuæ pietatis opus peragere possem.

Actus fidei.

Corde siquidem credo, mi Jesu, et ore confiteor, quia Pater æternus, Deus in seipso summe beatus, potens, perfectus et nullius egens, secundum infinitam misericordiam suam sic dilexit mundum, ut te, Filium suum Unigenitum, nobis daret Salvatorem. Credo quoque, quod tu ipse Patri æqualis per omnia, ex vi immensa charitatis tuæ de sinu Patris descendisti in uterum Virginis et propter nos Homo factus es ; et quod ex amore nostri hoc Sacramentum in ultima Cœna instituens, verum Corpus et Sanguinem tuum, idest te ipsum nobis ad manducandum dedisti ; et denique Patri tuo factus obediens usque ad mortem, te ipsum pro nobis hostiam in ara Crucis obtulisti.

Actus spei.

Ideoque spero in te, magna fiducia venio ad te, o Domine, qui nostri causa tam mira facere et tam

dira pati voluisti. Quid enim negabis, qui sic amasti ut te ipsum dares ?

Actus amoris.

Amo te quoque, o bone Jesu, ex tota virtute cordis mei, et semper deinceps et in æternum amabo, si tu dederis.

Actus humilitatis.

Verum quid habeo, quod non acceperim ? quid vilis creatura et miser peccator præstare poterit Deo, Creatori ac Domino suo ? Tu ipse ergo, supplex te oro, Domine Jesu, Patri tuo pro me repreæsenta merita tua et per illa supple omnem defectum meum, præcipue hujus, eheu ! tam imperfectæ præparacionis, qua ad hæc sacra Mysteria venio ; ut sic per te ei p'laceat obsequium indignissimæ servitutis meæ.

Actus postulationis.

Fac etiam, o bone Jesu, ut hoc tremendum Mysterium debita semper fide, reverentia et gratitudine prosequar, idque puro et ardentि corde nunc et semper recipiam. Statum quoque Sacerdotalem, ad quem me singulari gratia vocare dignatus es, charitate, castitate, mansuetudine, humilitate, patientia, sobrietate moribusque tibi placitis, et Sacerdote dignis, semper excolare studeam, ut ita servitus mea tibi placeat ad majorem gloriam tuam, Ecclesiæ utilitatem et propriam proximique salutem.

Actus unionis cum Deo.

Unde tandem supplex rogo, ut per virtutem Corporis et Sanguinis tui, abstrahas cor meum efficaciter ab omnibus noxiis affectibus NN., qui gustum

et fructum hujus Sacramenti impediunt; et me intime tibi unias et incorpores; ut gustem quam suavis sis, Domine, et unus tecum efficiar spiritus; ut tu in me, et ego in te maneam; ideoque nihil sit, quod me umquam separare valeat a te: nam tibi adhaerere mihi bonum est. Quid enim mihi est in cœlo, et a te quid volui super terram! Deus cordis mei, et pars mea in æternum.

Oratio ad B. M. V.

O Maria, *Mater inviolata et intemerata*, ab omni peccato et imperfectione semper immunis, omnique virtutum splendore coruscans, pro me misero intercede peccatore, ut, gratiae stola circumdatuſ, Sanctissimum Missæ Sacrificium digne offeram, et quotidie majus peccati et iniquitatis odium et virtutum Sacerdotalium amorem ex illo hauriam. Amen.

Oratio ad Sanctos.

Rogo te, piissime Deus, ut suffragiis S. Angeli Custodis, S. Joseph, SS. Patronorum meorum NN. et Sancti N. ab omni peccato absolutus, mundo corde et corpore ad sacras aras accedere, ibique hostiam puram, hostiam sanctam, hostiam immaculatam omnipotenti Deo pie et devote merear offerre. Amen.

DIES V.

POST MISSAM.

Oblatio sacrificii Patri æterno.

Sanctissime Pater, en ego indignissima creatura tua suscepit dilectissimum Filium tuum, eumque

tamquam rem meam, mihi conjunctam, in pectore meo adhuc contineo: illum ergo in modum justi Simeonis in ulnas meas suscipiens, tali affectu et intentione, quali semetipsum tibi obtulit jacens in præsepio et pendens in Cruce, offero Majestati tue ad supremam laudem et gloriam tuam, in recognitionem tui supremi dominii, in gratiarum actionem omnium beneficiorum ulli umquam creaturæ concessorum et in plenam abolitionem omnis injuriaæ abullo umquam tibi irrogatae.

Offero illum quoque ad supremam laudem et gloriam ejusdem Domini nostri Jesu Christi, in cultum et memoriam sanctissimæ Incarnationis, Nativitatis Passionis, Resurrectionis et Ascensionis, omnique Mysteriorum vitæ et mortis ejus: item in cultum et augmentum gaudii, gloriae et beatitudinis Sanctæ et Immaculatæ Virginis, Matris ejus, omniumque Angelorum et Sanctorum, maxime illorum, quorum hodie memoriam agimus et Patronorum meorum,

Et quia, o Domine, suscipiendo Filium tuum, factus sum particeps omnium ipsis meritorum, his innexus audeo te rogare pro sanctissima gratia tua, qua perficere possim ejus sanctam voluntatem; ad hoc enim ipse me tanti Sacramenti consortem fecit, ut deinceps tibi vivam, mihi moriar; ut sim humilis, patiens, charitate repletus, castus et perfectus. Da ergo mihi, Sanctissime Pater, ut adimpleam hanc divinam Filii tui voluntatem; exorna me his sanctis virtutibus, Fide, Spe, Charitate, Patientia, Castitate, Mortificatione, omnibusque gratis, quas scis mihi esse necessarias: largire purissimam illuminationem intellectus ad cognoscendum beneplacitum tuum, et ad faciendam semper voluntatem tuam corroborame: ut in omnibus et per omnia tibi placeam, tibi fideliter serviam, teque constanter ac sincere amem et diligam.— Sanctifica, o Pater piissime, Ecclesiam

tuam, aufer ab ea omnia scandala et schismata, ut fiat unum ovile et unus Pastor. Effunde misericordiam tuam in gentes, quæ te non noverunt, et illumina corda illarum, ut te cognoscant et ament; dissipa consilia impiorum, ne regno tuo officiant et propagationi gloriae tue: da Summo Pontifici, Praelatis, Ordinibus Ecclesiasticis ac omnibus Religiosis tuum amorem, et ut suis officiis rite fungantur; da Regibus, Principibus, cunctisque Magistratibus sapientiam, qua justitiam fideliter administrent, pacemque sequantur, ac populo tuo tuam da benedictionem; tribue agonizantibus veram contritionem tuumque amorem, peccatoribus veniam et veram emendationem, inimicis meis tuam charitatem, amicis, benefactoribus et consanguineis meis tuam dilectionem et dulcedinem; huic Congregationi bona spiritualia et temporalia; nosque et omnia nostra dirige, ut cultus tuns hic semper vigeat et perseveret; animabus in Purgatorio detentis, illis maxime, quæ suffragia mea expectant, vel quibus sum obligatus, requiem sempiternam ac beatam tui fruitionem.

Anima Christi. etc pag. 45.

Oratio ex Missali, pro vivis et defunctis.

Purifcent nos, quæsumus Omnipotens et Misericors Deus, Sacraenta quæ sumpsimus; et intercedentibus omnibus Sanctis tuis presta: ut hoc tuum Sacramentum non sit nobis reatus ad poenam, sed intercessio salutaris ad veniam; sit ablution scelerum, sit fortitudo fragilium, sit contra mundi pericula firmamentum; sit vivorum atque mortuorum fidelium remissio omnium delictorum. Per Dominum nostrum Jesum Christum, Filium tuum, qui tecum vivit et regnat in unitate Spiritus Sancti, Deus, per omnia saecula saeculorum. Amen.

Oratio cum indulgentia trium annorum

CONCESSA A PIO IX.

Obsecro te, Dulcissime Domine Jesu Christe, ut Passio tua sit mihi virtus, qua muniar, protegar atque defendar; Vulnera tua sint mihi cibus potusque, quibus pascar, inebrier atque delecter: aspersio Sanguinis tui sit mihi ablutio omnium delictorum meorum: Mors tua sit mihi gloria sempiterna. In his sit mihi refectio, exultatio, sanitas et dulcedo cordis mei. Qui vivis et regnas in saecula saeculorum. Amen.

Oratio ad B. M. V.

O Mater inviolata et intemerata, semper pura, casta, ab omni peccati labe semper immunis et cunctarum virtutum sacrarum, pro me pauperculo orare digneris, ut in Dei amore semper vivam, jugiter crescam et tandem cursu hujus labilis vitae feliciter peracto, beato fine quiescam, Deum aeternaliter tecum possessurus in celis. Amen.

Oratio ad Sanctos.

Ad vos, o S. Angele Custos, S. Joseph, SS. patroni mei NN. et Sancte N. suppliciter recurro, ut vobis intercedentibus fructus hujus Sacrificii perpetuo conservem, in fortitudine cibi illius ambulem per hujus mundi desertum usque ad montem Dei, et ibi, Jesum revelata cernens facie, visu sim beatus ejus gloriæ. Amen.

DIES VI.

ANTE MISSAM.

Nullum aliud opus adeo sanctum a Christi fidelibus tractari potest, quam hoc tremendum Sacrificium, unde satis apparet omnem operam in eo ponendam esse, ut quanta maxima fieri potest cordis munditia aquae exteriori devotione ac pietatis specie peragatur. (S. Conc. Trid. sess. 22.)

Actus adorationis.

Pronos te adoro, Suprema Majestas, te veneror et nihilum meum ante te profiteor. Utinam omnium tuorum Electorum adorationis actus corde, ore et opere exercere possem; Sed pro me adorent te omnes Angeli; pro me ante te flectatur omne genu cœlestium, terrestrium et infernorum. Amen.

Actus fidei.

Credo in te, JESU Veracissime, credo et confiteor te in augustissimo Sacramento Corporis et Sanguinis tui vere præsentem esse, Deum meum et Dominum meum. Credentem adjuva, ut in hac fide constanter vivam et sancte moriar. Amen.

Actus spei.

In te confidit peccatrix anima mea, Eucharistie Jesu, quia in hoc Sacramento salus es omnium in te sperantium. Sperantem benignus respice et concede ut peccatorum sordibus ablutus, immaculatam Corporis et Sanguinis tui hostiam sic suscipiam, ut digne te sumentibus promissam consequar vitam æternam. Amen,

Actus charitatis.

O Jesu, qui, ut immensum tuum in me amorem probares, Corpus tuum in cibum et Sanguinem tuum in potum reliquisti: te amo toto corde, tota mente, tota virtute. Atque utinam omnium hominum et Angelorum affectus et amores in mea essent potestate, omnibus et singulis intensissime super omnia nunc et in perpetuum amare te vellem, quia omni amore dignissimus es. Da, Domine Jesu, ut te semper in vita et in morte ita diligam, sicut tu amari dignus es. Amen.

Actus desiderii.

Quem admodum desiderat cervus ad fontes aquarum, ita desiderat anima mea ad te, Deus, Salvator meus. Ad te venio, post te clamo esuriens et sitiens: da mihi Panem tuum supersubstantiale, da Vinum quod miscuisti, ut refocilletur anima mea: te unice semper desideret et æternum in te quiescat. Amen.

Actus humilitatis.

O Supremæ Majestatis Deus, qui Rex regum es, et Dominus dominantium, quomodo præsumam ad te accedere vermiculus terræ, tot oneratus miseris et peccatis? Qua fiducia coram te apparebo, Justissime Judex, in cuius conspectu columnæ cœli contremiscunt? Respic misericorditer, Piissime Jesu, servum tuum, et quem tam amanter invitatis, beneficio tuo reddas dignum. Amen.

Actus contritionis.

Doleo, mi Jesu, ex intimis animi mei visceribus,

et utinam infinite dolere possem, quod te Deum, Redemptorem meum benignissimum offenderim, qui me usque adeo dilexisti, ut mortem acerbissimam pro me subire non renueris. Ignosce, queso, suppli- citer veniam petenti ; miserere servi tui, pro quo vox Sanguinis tui interpellat. Ecco firmissime statuo universa deinceps peccata fugere, et hactenus com- missa in amaritudine animæ tibi recognoscere. Adju- vet me, Deus, gratia tua ! Amen.

Directio intentionis.

Omnipotens, Sempiterne Deus, en ego omnium in- dignissimus famulus tuus, quem sacris Altaribus tuis pro summa pietate tua adstare voluisti, assisto conspectui ter adorandæ Majestatis tuae timens ac tremens et apud te legationem fungens. Quam ma- ximo possum amoris, reverentiae et devotionis affectu volo et intendo Sacrosanctum Sacrificium Missæ juxta ritum Sanctæ Romanae Ecclesiæ tibi offerre, et ex nunc illud tibi offero una cum omnibus Sacri- ficiis, tibi umquam oblatis, et in ævum offerendis, in unione admirabilis illius Sacrificii, quod Unigenitus tuus, Summus et Æternus Sacerdos in ultima Cœna instituit, et in Cruce consummavit. Et primo quidem in holocaustum tamquam Creatori ac Summo Principio meo, rerumque omnium Supremo Do- mino ; in hostiam eucharisticam pro innumeris be- neficiis, quæ Beatissimæ Virgini, Angelis et homi- nibus et speciatim mihi indignissimo hactenus con- tulisti ; in victimam propitiatoriam pro meis om- niumque hominum peccatis ; et tandem in Sacrificio im- petratorum pro totius Ecclesiæ militantis et pa- tientis meisque tibi notis necessitatibus. Fac me ergo, Domine, dignum Altaribus tuis Ministrum ; ut quod mea voce depromitur tua sanctificatione firme- tur. Amen.

Oratio ad B. M. V.

O Mater Jesu Christi, *Mater amabilis*, amabilis Deo, amabilis hominibus, amo te toto cordis affectu; me- rear quoque amari a te, quæ cum Ecclesia nobis in- clammas : *Ego diligentes me diligo ! monstra te meam esse Matrem, et ora pro me, ut digne ad Sancta Sanctorum ingrediar.* Amen.

Oratio ad Sanctos.

Domine Jesu Christe, qui me ad officium Sacer- dotiale eligere dignatus es, nunc ad sacra Mysteria recolenda accedens, indignitate mea sum perterri- tus. Quapropter Sancti Angeli Custodis, S. Joseph, SS. Patronorum meorum N. et N. et Sancti N. merita et virtutes tibi offero, orans ut horum intuitu mihi meam indignitatem condonare digneris. Amen.

DIES VI.

POST MISSAM.

Gratiarum actio.

Verum ergo est, mi Jesu, et firmissime teneo, te intra me taliter existere ; ita te mihi esse unitum, verum Deum et Hominem, ut unum sis tecum et ego unum tecum. O miradignatio ! O amor immen- sus ! Audite insula et attendite populi de longe et narrabo vobis quanta fecit Deus animæ meæ : cum essem abjectus in domo mea, de pulvere erexit me et constituit me cum Principibus populi sui, ut comederem Panem et biberem Vinum in Mensa sua omnibus diebus vitæ meæ. Quas ergo tibi modo gra- tias referam, mi Misericordissime Jesu, pro tam ex-

celso et incomparabili beneficio; aut quid retribuam tibi pro omnibus quæ tribuisti mihi? Tantum tibi debo, quanti tu vales qui infinitus es; sed en totum meti in holocaustum offero et plus quam me totum, et ex toto corde meo, et plus quam ex toto corde meo. Jubilent et benedicant tibi, (utinam infinite) cor meum, anima mea, vires, sensus, potentiae et quidquid in me est motus. Jubilent et benedicant tibi mecum universi populi, tribus et linguae, omnes Angeli et Electi tui, et laudem tibi perpetuam dicant cunctæ creaturæ, quæcumque cœli, terræ et abyssi ambitu continentur. Tibi soli, Regi sæculorum immortalis, omnishonor, laus, gloria et gratiarum actio, qui es benedictus Deus et laudabilis in sæcula. Amen.

Pie petitiones.

Piissime Jesu, qui me Corpore tuo immaculato et pretiosissimo Sanguinerefecisti, ignosce obsecro indignitati meæ, et quidquid in hujus Missæ celebratione deliqui, misericorditer indulge, meritorumque tuorum excessu benignissime supple. Ne me patiaris ob defectum meum sine fructu a te recedere, sed operare mecum misericorditer, sicut cum Sanctis tuis operatus es mirabiliter, et fac me ambulare in fortitudine cibi illius usque ad montem perfectionis. Dirige corpus et animam meam, omnes cogitationes, verba et actiones meas, omnia interiora et exteriora mea secundum voluntatem tuam ad majorem nominis tui gloriam et honorem, et concede mihi quæ tibi sunt placita ardenter concupiscere et perfecte adimplere. Averte a me omnem vanitatem, inanis gloriæ appetitum, divitiarum cupiditatem, carnis concupiscentiam, oris scurrilitatem, ventris intemperantiam, scelera odii et detractionis omnemque vindictæ affectum. Esto, mi Eucharistice Deus, mo-

tum meorum tam carnalium quam spiritualium perfecta quietatio, contra insidias inimicorum meorum tam visibilium quam invisibilium firma defensio, omnium vitiorum meorum evacuatio; charitatis et patientiæ, humilitatis et obedientiæ, mansuetudinis et prudentiæ, sobrietatis et continentiæ, omniumque virtutum augmentatio; et sic in hoc sæculo in preceptis tuis et in vocatione mea me fac perseverare, ut ad illud ineffabile convivium aliquando merear admitti, ubi tu cum Patre et Spiritu Sancto Sanctis tuis es plena satietas, consummata jucunditas et perfecta felicitas. Amen.

Alia Oratio ad Jesum.

Obsecro te, Mitissime et Bone Jesu, ut hæc immortalis Hostia pro me tibi gratias referat, me tibi reconciliet, me tibi restituat, mihi peccatori veniam triviat et ad vitam perducat æternam. Amen.

Anima Christi. etc. pag. 45.

Oratio

EX MISSALI ROMANO.

Sumptis Redemptionis nostræ muneribus, praesta quæsumus, Misericors Deus, eorum nobis celebratio ne tuæ Protectionis contra omnes adversitates subsidi um. Per Dominum nostrum Jesum Christum Filium tuum, qui tecum vivit et regnat in unitate Spiritus Sancti, Deus, per omnia sæcula sæculorum. Amen

Oratio

S. FRANCISCI ASSISIENSIS.

Domine Deus, ecclæstis Pater, respice in hanc glo-

riosam Christi tui faciem, et miserere mei et cæterorum peccatorum, pro quibus benedictus Filius tuus et Dominus noster dignatus est mori, et pro quorum salute et consolatione in Sancto Sacramento Altaris nobiscum voluit remanere: cum quo Divino Filio tuo et Spiritu Sancto tu es unus Deus, et vivis in sæcula sæculorum. Amen.

Oratio ad B. M. V.

Beatissima Mater Jesu, *Mater amabilis* quæ cunctis ad te confugientibus misericordiæ tuæ sinum aperis, ad te supplex recurro, orans et obsecrans, ut fructus hujus sanctissimi Sacrificii copiose animæ meæ donentur, illos sollicite custodiam, et per sanctum eorum usum, te juvante, me ad majora indies percipienda disponam. Amen.

Oratio ad Santos.

Intercedite pro me, S. Angele Custos, S. Joseph, SS. Patroni mei N. N. et Sancte N. et piissimo vestro interventu et patrocinio obtinetis mihi, ut semper per charitatem in Domino meo Jesu Christo permaneam et ipse, sicut promittere dignatus es, in me maneat per gratiam suam. Amen.

DIES VII.

ANTE MISSAM.

Sacerdotium in terris peragitur, sed in rerum cælestium ordinem referendum est (S. Chrys. Dial. L. III.)

O Sacerdos Dei, si altitudinem cœli contempleris, altior es; si Dominorum sublimitatem, sublimior es, solo Deo et Creatore tuo inferior es. (Cass. de Cat. Glor.)

Actus Fidei.

Credo, Veracissime Jesu, te Deum et Dominum meum sub candido specierum Sacramentalium velamine esse præsentem, et pro hac assertione millies mori paratus sum, Credo inquam, quod in hoc Sacramento Corpus tuum gloriosissimum vere adest sole splendidius, electum ex milibus cum ea integritate, pulchritudine et Majestate, qua in cœlo existit. Ibi adest Sanguis, olim pro omnium salute effusus. Ibi Anima tua, in qua sunt omnes thesauri gratiae, sapientiae et scientiae Dei. Ibique denique latet Divinitas tua, Verbum scilicet omnipotens, per quod Pater loquitur; et quia tu in Patre et Pater in te est, adest etiam Pater, te Verbum suum generans; adest et Spiritus Sanctus utriusque nexus et amor. Hoc est compendium omnium mirabilium tuorum, cuius veritatem infallibilem, telargente, per gladios, enses et flamas omnes profitebor.

Actus desiderii.

Quemadmodum desiderat cervus ad fontes aquarum, ita et multo plus ad te, Salvator meus, desiderat anima mea; sitio enim, Domine, lassatus in via iniuritatis; sitio te venam aquarum viventium; sitio Sanguinem tuum, quem in potum nobis tribuisti; renuitque consolari anima mea, donec epuletur in mensa tua. Miserere ergo mei, Fili David, et da mihi Panem vitæ æternæ et Vinum germinans Virgines, ut refocilletur deficiens anima mea.

Actus humilitatis.

Desiderat ad te, Domine, anima mea, sed me re-

tinent in via summa dignitas tua et ima indignitas mea. Tu es Rex regum et Dominus dominantium ; tu sanctitas increata, in cuius conspectu ipsi Angeli non sunt mundi ; tu sol mirabiliter illuminans a montibus æternis ; ego vero vermis terræ, animal immundum, omnium calamitatum ludibrio expositum, insanis passionum motibus continuo agitatum, vas contumeliae et filius tenebrarum. Quomodo præsumam ad te accedere ? ego in quo nullus ordo sed sempiternus horror inhabitat. Qua fiducia miserabilis peccator coram te apparebo, Justissime Judex, in cuius præsencia columna cœli contremiscunt ?

Actus fiducie.

Non auderem, Celsissime ac Sanctissime Deus, ad aram tuam gressus meos dirigere, teque in eo immolare et suscipere, nisi fiduciam præberes mihi ; sed tu qui noscis figuramentum meum, et quod in peccatis conceperit me mater mea, invitas mead Altareatum, et vis ut sumam te Deum meum, dicens : venite, comedite Panem meum et bibite Vinum, quod miscui vobis ; nisi manducaveritis Carnem Filii Hominis, et biberitis ejus Sanguinem, non habebitis vitam in vobis. De tua igitur benignitate confusus accedo ad te, ut ovis morbida ad pastorem, ut infirmus ad medicum, ut reus morti obnoxius ad advocatum ; ut me foveas, protegas et salves. Abyssus nihil mei abyssum invocat bonitatis tuae ; et licet peccata mea plura et gravissima sint, ea tamen nihil sunt, quamvis plura et graviora forent, si cum misericordia et pretio Sanguinis tui conferantur. In hoc reposita est fiducia mea, et gaudeo quod nihil in me sit, in quo possim confidere. Misereberis mei et salvabis me ; quia numquam deseris sperantes in te.

Actus amoris.

Amantissime Jesu, qui exiturus ex hoc mundo eximium pignus amoris dedisti mihi, parans in conspectu meo Mensam habentem omne delectamentum, redamo te unicum meum solatium in hoc exilio, unica spes languentis animæ, unica mea felicitas, et summum bonum, quo in terra frui licet : redamo te ex toto corde meo, et utinam omni momento te ferventius semper amarem. Amorem, quæso, meum teipso inflamma, qui esca et pabulum amoris es. O ignis ardens et numquam deficiens, ure renes et cor meum, ut ardeat amore tui. Ignem venisti mittere in terram, accende illum et eventila, ut semper crescat : potius pereat omnis substantia mea, quam amor tui in me pereat.

Actus contritionis.

Sed eheu ! Domine Jesu, tam miser sum, tam indecorus usque huc in sancta mea vocatione vixi, tam sæpe et tam graviter Divinam tuam offendি Majestatem ; vere iniquitates meae supergressæ sunt capillos capitis mei ; sed de iis nunc sincere doleo ob amorem tui super omnia, et potius mori volo, quam te posthac offendere.

Directio intentionis.

Tibi, Domine Deus, offero Sacrificium corporis et Sanguinis unigeniti Filii tui, in recognitionem supremæ Majestatis. In gratiarum actionem pro gloria tua, pro gloria Sanctæ Humanitatis Domini nostri, Jesu Christi, sicut et pro omnibus beneficiis mihi et toti humano generi concessis. In remissionem peccatorum meorum et peccatorum totius mun-

di, uti et in reparationem omnis injuriæ tibi per peccata illatæ. Tandem in imprecatiōnem gratiarum N. et N. pro me et illis vivis et defunctis, pro quibus offerre intendo. Simul cum hoc meo Sacrificio offero tibi omnia Sacrificia et bona opera per universum mundum tibi hodie oblatæ, enixe rogans, ut ea accepta habere digneris, nosque eorum fructuum reddere participes.

Oratio ad B. M. V.

O Mater admirabilis, o prodigium naturæ et gratiæ, quæ, immaculata in tua conceptione, omnibus donis corporis et animæ meruisti ditari et in Matrem eligi Redemptoris, in me abjectissimum digneris respicere, ut sine noxa altari ministrem, et a dilectissimo Filio tuo, Domino nostro, Jesu Christo, omnibus virtutibus merear ornari, quibus digne ejus ad sanctum Altare locum queam tenere. Amen.

Oratio ad Santos.

Per merita et intercessionem S. Angeli Custodis, S. Joseph, SS. Patronorum meorum N. N. et Sancti N. te suppliciter deprecor omnipotens Deus, ut salutifera hostia hodie per manus meas ad thronum majestatis tuæ cum odore suavitatis ascendat et gratia tua super me et super omnes, vivos atque defunctos, pro quibus sanctum Sacrificium offerre propono, copiose descendat. Amen.

DIES VII.

POST MISSAM.

Gratiarum actio.

Quid retribuam Domino pro omnibus, quæ in Mensa coelestis convivii retribuit mihi? Venite ad me omnes Electi et Sancti Dei, audite et narrabo vobis, quanta Deus fecerit anime meæ: cum essem pauper et abominabilis, nec auderem oculos meos elevare in cœlum præ multitudine iniquitatum mearum, magnificata est super me misericordia ejus: mihi dedit saturari de Carnibus suis et proprio suo Sanguine inebriari. Laudes agite ei pro me universi populi, tribus et lingue; jubilate ei omnes creature, quas universus orbis in suo ambitu comprehendit. Benedic in idipsum anima mea Domino, et omnia, quæ intra me sunt, nomini Sancto ejus. Benedic anima mea Domino, qui coronat te in misericordia et miserationibus, et noli oblivisci omnes retributiones ejus.

Actus oblationis.

Servus tuus sum ego, Domine Deus, et pro tributo servitutis meæ aliquid tibi offerre vellem, quod Majestate tua dignum foret; sed hoc excedit facultatem meam et debitum meum, quia tantum tibi debeo, quanti tu vales, qui infinitus es. Offeram interim Majestati tuæ quod possum: trado enim me tibi in servum perpetuum abjecta de me omni cura et sollicitudine. Quidquid mihi evenire permiseris a Divina manu tua illud amantissime suscipiam. Vivat semper et regnet super me beneplacitum tuum, quod in omni verbo, actione, cogitatione et levissimo quoque motu implere desidero. Suscipe igitur me, Do-

mine, animam meam et corpus meum, ut sim perpetuum holocaustum, jugiter ardens coram te. Praesta, ut deinceps nec membra, nec sensus, nec potentias, nec vitam habeam, nisi ut te amem et serviam tibi.

Devoti affectus et aspirationes ad Jesum.

Salve mi Jesu, dulcis hospes animæ; te saluto ex intimis animæ meæ visceribus, et qua possum devotione et veneratione te excipio. Fac ut deinceps nil aliud desiderem, nil aliud in votis habeam, nisi ut serviam tibi; omnibus enim votis me tibi in servum perpetuum offero, et ad omne beneplacitum tuum me totum resigno.

Salve Corpus Jesu Sacratissimum, quinque vulneribus sauciatum; pone te ut signaculum super cor meum, et imprime illi charitatem tuam, ut hoc sancto succensus igne, jugiter tibi ardeam.

Salve Sanguis Jesu pretiosissime, qui omnem hominem abluis et purificas; lava animam meam, et pone signum in faciem meam, ut nullum præter te umquam amatorem admittam.

Salve Jesu, Rex cordium admirabilis, et affectum nostrorum triumphator nobilis; sim modo totus cor, ut totus amem te: sint omnes sanguinis mei guttulae tot corda, ut singulis te intensissime amare valeam. Quoties aspiro, quoties respiro, imo ad omnem ictum oculi, ad singulos arteriæ pulsus, toties repeterem volo: Adoro te profundissime, mi Jesu Eucharistice; te amo corde et affectu omnium, quia me amasti in immensu.

Salve Jesu, Amor meus! O quam amare et sincere doleo, quod te, Deum meum, summum et unicum bonum meum toties et tam graviter offenderim. Unum nunc a te peto, id ne, quæso, deneges mihi: Moriar potius millies et millies, quam vel in minimo amplius deliberate delinquam!

Salve Jesu, sola jucunditas mea, unica salus animæ meæ, Deus meus et omnia! Vive nunc, et regna in me semper! Verte mihi terrena omnia in amaritudinem, omnia infima et creata in contemptum et oblivionem. Attrahe cor meum ad te in cœlum et ne dimittas me vagari super terram. Aufer a me amorem hujus sæculi, et nihil mihi ultra sapiat, nihil me alliciat, nihil delectet nisi tu.

Anima Christi. etc. pag. 45.

O Jesu, mi dilecte!

Amabo te perfecte,

Dum me amoris telo

Transfixeris e cœlo.

Transfige, ah transfige me!

O Jesu dilectissime!

Oratio ad B. M. V.

Configio ad te, *Mater admirabilis*, quæ Jesu-Chriti Mater esse meruisti, ipsum nutritisti, illique ut pia Mater semper et in omnibus adfuisti; sis etiam mihi *Mater admirabilis*, me custodiendo et protegenden, ne unquam a via justitiae recedam, sed econtra viam perfectionis, sicut ex vocatione mea Sacerdotali teneor, firmo gressu percurram. Amen.

Oratio ad Sanctos.

Te laudent et pro me benedicant, Domine Jesu Christe, S. Angelus Custos, S. Joseph, SS. Patroni mei N.N. et Sanctus N. et apud thronum gratiæ tuæ pro me deprecari dignentur, ut prospera mundi despiciens, nullaque ejus adversa formidans, securus tandem ad te perveniam, et te sine fine, cum Angelorum et Sanctorum agminibus, laudem, benedicam et amem in cœlis. Amen.

DIES VIII.

ANTE MISSAM.

In Lege Veteri Deus a Sacerdotibus omnimodam exigebat mundiam, dicens: « Mundamini qui fertis vasa Domini! » quanto mundiores esse oportet, qui in manibus et in corpore suo portant Christum? (Petr. de Blois Ep. 123.)

Oratio ad Patrem.

Respice, Clementissime Pater de sanctuario tuo et de excelso cœlorum habitaculo et intuere hanc immaculatam Hostiam, quam tibi offert Magnus Pontifex noster, Jesus Christus, Filius tuus, Salvator mundi: pro peccatis fratrum suorum. Esto placabilis super multitudinem malitiae nostræ: quia vox Sanguinis Domini nostri clamat ad te de Cruce. Hic est justitia mea et sanctificatio, ac redemptio mea. Averte faciem tuam a peccatis meis et respice in faciem Christi tui; ejus enim merita tibi offero omnemque fiduciam in eis defixam habeo. Impellit me ministrandi necessitas, terret conscientia indebiti Sacerdotii: sed rogo te ne despicias mihi creditæ dispensationis officium, licet in me boni operis testimonium non agnoscas. Et quia me indignum mediatorem esse voluisti inter te et populum tuum, ne me repellas a tua pietate cum divinissimis donis tuis venientem ad te: ut, inculpate accedens ad gloriam tuam, dignus sim, qui operiar protectione Unigeniti Filii tui et illuminatione Spiritus Sancti; utque, pro omnibus deprecans, pro omnibus exaudiar, te præstante, Deus meus, Pater misericordiarum, qui cum eodem Filio tuo in unitate ejusdem Spiritus Sancti vivis et regnas in sœculorum. Amen.

Oratio ad Filium.

Gratias ago tibi Domine Jesu Christe, pro ineffabili tua charitate, qua transiturus de hoc mundo ad Patrem, Mensam mihi parasti in dulcedine tua. Mensam prorsus regalem, omne delectamentum in se habentem; Mensam pretiosissimam Corporis et Sanguinis tui: ut adipe et pinguedine repleatur anima mea, et secreto illapsu nutritionis tuæ roboretur infirmitas mea. Sed quomodo accedam ad te ego homo miserrimus et omni ornamento destitutus? Obsecro ergo te, benignissime Salvator, cujus charitas imensa est, cujus bonitas, infinita, ut Sanguine tuo animam meam lavare et super nivem dealbare, atque meritis tuis induere digneris. Obsecro quoque Beattissimam Virginem, Matrem tuam, et omnes Electos tuos, ut pro me tibi offerant charitatem, fidem et devotionem, qua hoc augustissimum Sacramentum suscepserunt ab initio institutionis ejus usque in præsentem diem. Et quia particeps sum omnium timentium te, offero tibi omnium Sacerdotum, omniumque fidelium hac die celebrantium et communicantium pietatem et puritatem; offero omnium justorum, a mundi origine usque ad ejus consummationem, virtutes et merita, ac pios affectus erga te, dulcissime Jesu, in Venerabili Sacramento vere præsentem. Hos, inquam, aliosque sanctos affectus offero tibi in supplementum insufficientiæ meæ, et eas, si possem, cum maxima intentione elicerem ad laudem et gloriam tuam, quia dignus es. Suscipe, Domine, hoc desiderium meum meritisque placatus Electorum tuorum, ne a Mensa tua repellas me; quatenus hoc cibo satiatus, hoc recreatus potu, vitam habeam et abundantius habeam, hic et in æternum. Amen.

Oratio ad Spiritum Sanctum.

Veni Sancte Spiritus, Amor Patri et Filii ; veni e patri felicitatis et cordis mei penetralibus tam potenter illabere, ut vitia omnia et defectus meos tuo igne consumas, et cuncta peccata mea remittas. Fac me dignum Sacris Altaribus Ministrum, meque torrente tuae voluptatis inebria, ut cœlesti suavitate in hac Divinissima Mensa degustata, nihil venenatæ mundi dulcedinis libeat amplius degustare. Imbut me et perficiat Septiformis Spiritus tuus et ad illum scientiæ gradum fac me pertingere ad quem pervenit Apostolus tuus cum dicebat, se nihil scire nisi Jesum Christum et hunc Crucifixum. Roboretur infirmitas mea fortitudine tua, vincat bonitas tua malitiam meam, et deformitas mea tua pulchritudine decoretur. Sursum erige me per æternorum affectionem, uni me tibi per Divinum amorem, conserva per finalem perseverantiam ; ut tuo ductu revoleat anima mea ad te principium et finem suum, a quo numquam separetur. Amen.

Oratio ad B. M. V.

Sancta Virgo Maria, quæ *Mater Creatoris* fieri meruisti, me famulum tuum, Hostiam immaculatam in Altari oblatum, clementer respice ; ut in conspectu Divinæ Majestatis pro mea et totius mundi salute cum odore suavitatis ascendat, et gratia e summo cœlorum habitaculo super me et super omnes pro quibus celebrare intendo, per illam copiose descendat. Amen.

Oratio ad Sanctos.

Obsecro clementiam tuam, piissime Domine Iesu Christe, præsent mihi hæc immaculata Mysteria per

intercessionem S. Angeli Custodis, S. Joseph, SS. Patronorum meorum N. N. et Sancti N., fidei, spei et charitatis augmentum, sintque mihi et omnibus, tam vivis quam defunctis, pro quibus sacrificium offerre intendo, causa salutis æternæ. Amen.

DIES VIII.

POST MISSAM

Oblatio.

Quid retribuam tibi pro dignatione hac, Jesu mi dulcissime? quodnam donum hoc prægrande exæquabit beneficium? Si corpus et animam dederò pro hac dilectione, quasi nihil reputabitur. Quid igitur deferas, o animæ meæ Spouse dilectissime? Utinam Seraphinorum corda, tuo amore succensa nimium, una cum cordibus Sanctorum omnium in cœlo terraque tibi placentium possiderem; omnia illa corda in gratiarum actionem pro tanto offerrem beneficio. Verum, o piissime Jesu, hæc corda mea non sunt; quid igitur tibi offeram? Audio vocem tuam super mel et favum dulciorem: Fili, præbe cor tuum mihi! O amator noster, cujus deliciæ sunt esse cum filiis hominum, petisne in remunerationem cor meum? Quomodo illud tibi denegabo, qui fabricasti illud? Utinam purum et sine macula tibi illud offerre valerem! Sed, eheu! multis illud criminibus maculavi! Utinam modo presentia tua Sanctissima liquefias, purificetur; ut, despactis quibus adhaeret, transitoriis, tibi soli placeat! Accipe cor meum, quod tibi voluntate integra offero, ut igne amoris tui resorbetur. Jaculo amoris tui transfige illud, quia sit te. In signum vero amoris reciproci renuntio omni delectationi terrenæ propter te; mundum ejusque vanitatem contemno et semper contemnam. Ne ergo

permittas me posthac amplius separari a te ; ne patiaris ut profana cor meum subeant, in quo mansio-nem tuam dignatus es eligere ; ne admittas cogita-tiones aut desideria vana vel peccaminosa ad lectum, in quo ipse re quiescis. Quantum in me est, gratia tua propono fortiter me facturum, ut proposita hæc amore tui concepta, opere compleam.

Oratio ad Jesum.

O Patris Sapientia, natus de Virgine, qui non es designatus Venerabile Corpus tuum tangi et sumi a me indigno peccatore ; quid tibi digne reddam pro omnibus quæ retribuisti mihi ? Si totius mundi me-rita in unum essent congesta, non valerent tuæ di-gnatiōnali aliquatenus comparari. Gratias ergo ago tibi Domine Jesu Christe, Fili Dei vivi, et gratiarum actiones pro posse fragilitatis meæ tuae tremendæ Majestati et immensa Pietati refero, quod Sacro Cor-pore tuo et Sanguine animam nimis aridam dulciter refecisti. Rogo te, ut quidquid in me vitiosum ac tuæ voluntati contrarium invenitur, Communione hujus Sacramenti funditus evacuetur et cor meum dignum Sancti Spiritus habitaculum præparetur. O dulcissime Jesu, sit hoc Sacramentum Corporis et Sanguinis tui sanitas et dulcedo animæ meæ, salus et sanctitas in omni tentatione, pax et gaudium in omni verbo et opere, solamen et tutela finalis in morte, ut in illa hora suprema, Divino tuo Corpore refectus, et firmatus, et Sanctissimo Sanguine ablu-tus et mundatus, cum fiducia in conspectu tuo ap-paream. Amen.

Oratio in postulationem beneficiorum.

Clementissime et misericordissime Jesu, miserere Ecclesiae tue, miserere mei et hujus loci. Concede,

ut sit in me, hic et ubique, humilitas, pax, charitas, continentia, puritas et sanctitas. Concede, ut omnes digne emendemus et corrigamus nos, et timeamus te, et serviamus tibi fideliter, et diligamus te, et pla-ceamus tibi. Commando pietati tuæ omnia negotia et necessitates nostras. Miserere omnium hominum pro quibus omnibus ac singulis Sanguinem tuum fudisti. Eja converte et revoca miseros peccatores. Da vivis gratiam et veniam : da fidelibus defunctis requiem lucemque sempiternam. Amen.

Anima Christi, etc. pag. 45.

Oratio

S. FRANCISCI ASSIENSIS.

Absorbeat, quæso Domine, mentem meam ab om-nibus, quæ sub cœlo sunt, ignita et melliflua vis amoris tui : ut amore amoris tui moriar, qui amore amoris mei dignatus es mori : per temetipsum Fi-lium Dei, qui cum Patre et Spiritu Sancto vivis et regnas in sœcula sœculorum. Amen.

Oratio ad B. M. V.

O beatissima Virgo Maria, digna quæ *Mater Crea-toris* fieres, supplicio te invoco, pro me intercede, ut usque ad ultimum vitæ meæ halitum Christo-Jesu, Creatori meo, fidele servitium exhibeam, et tandem, cum in sœculorum fine ad judicandum ve-nerit, stola gloriæ immortalitatis, fideli servo pro-missa, ab ipso merear vestiri. Amen.

Oratio ad Sanctos.

Tibi, Domine, merita et laudes offero S. Angeli Custodis, S. Joseph, SS. Patronorum meorum N.N. et

Sancti N., te humiliter deprecans, ut, ipsis intercedentibus, per hujus Sacramenti virtutem bonum certamen certare, cursum consummare, fidemque servare valeam, et tandem a te justo Judice coronam justitiae obtineam in cœlis. Amen.

DIES IX.
ANTE MISSAM.

Quidquid est effectus Dominica Passionis, est effectus hujus sacrificii. (S. Thom. in Eph. 6.)

Quoties hujus Hostie commemoratio recolitur, toties opus nostræ Redemptionis exercetur. (Orat. Dom. IX post Pent.)

Una enim eademque est Hostia, idem nunc offerens sacerdotis ministerio, qui seipsum in Cruce obtulit, sola ratione offerendi diversa. (S. Conc. Trid. sess. 23.)

Actus Fidei, Spei, Charitatis et Contritionis.

Credo in te, Domine Jesu Christe, quia tu es summa veritas, qui dixisti : Caro mea vere est cibus et Sanguis meus vere est potus. Spero in te, o Misericordia infinita, quia tu bonus erga nos promisisti : Si quis manducaverit ex hoc Pane, vivet in æternum. Amo te, o Bonitas æterna, super omnia, charitate quæ diffusa est in cordibus nostris per Spiritum Sanctum, qui datus est nobis ; et ideo doleo ex toto corde de peccatis commissis, eaque detestor cum proposito non peccandi de cætero ; cor contritum et humiliatum Deus non despicies.

Confessio Sacerdotis ante Missam.

Confiteor tibi Deo omnipotenti omnia peccata mea, quæcumque ab infantia usque nunc scienter autigno-

ranter commisi, et quæcumque præsertim in hac die ac nocte in verbo, in facto, et cogitatione contra tuam sanctissimam voluntatem patravi. Tibi confiteor et veniam peto, ut ira tua non veniat super me miserum peccatorem, sed benedictio tua descendat super me et maneat semper. Suscipe hanc confessionem meam, Domine Deus meus, unica spes salutis meæ, de quibuscumque peccatis, gulæ, ebrietatis, luxuriae, acedie, somnolentiæ, iræ, cupiditatis, invidiæ, detractionis, murmurationis, mendacii, vanæ gloriæ, levitatis, inobedientiæ, atque superbiæ ; de omni cogitatione, locutione, atque multis peccatis meis, quorum umquam coram te reus fui. Qui justificas impium et vivificas mortuos, resuscita me, Domine Deus meus, et indulge famulo tuo. Sum enim peccator indignus, qui præsumo ad tuum sanctum Altare accedere, et te invocare. Peccavi coram te Domine, et coram angelis tuis sanctis. Tribue mihi indulgentiam omnium delictorum meorum. Confirma me in operibus bonis et doce me facere voluntatem tuam omnibus diebus vite meæ. Præsta, ut tuum Sacro-sanctum Corpus et Sanguinem percipiere merear cum recta fide, spe firma, et perfecta charitate, non in iudicium et condemnationem animæ meæ, sed in remissionem omnium peccatorum meorum, et ad profectum in scientia Sanctorum, et stabilitatem in via salutis æternæ, ut tandem illuc merear introire, ubi tu summum bonum es, et ineffabile gaudium Angelorum et Sanctorum omnium. Amen.

Oratio ad Sanctum Spiritum.

Spiritus gratiæ et misericordiæ, ecce accedo ad Sanctum Altare, locum terribilem et metuendum, scalam cœli, per quam Deus ad nos descendit, et nos ad Deum ascendimus, ad ministerium omnium mi-